


Oxutta s'axetwani

Mukhalelo wa mw'Eruthuni

 Vano miyo...?...[Nipuro vahiitthu mufiitani—Mol.]
Ola p'ukathi woopacerya kitonko aka wira mwa khula mithukumano saka okhuma okathi kinkhal'aka vapuwani. Ola okathi musya. Munna Baxter oorowa; ni—ni Munna Bosworth ori oHintiya, ahiiso, wAfrika; nto Munna Baxter, nkisuwente otthu ory'awe. Owo oronwe nipuro nlo, ni akina aya aakhuma aarowa. Nto Billy ni miyo nri nno meekh'ihu, tivo ninkhalana okathi muulupale paahi: ovenya paahi, wiiva n'ukhuura. Vano, ni—ninoona ntoko khino ninoowerya, ni mukhaliheryo w'Apwiya, naamuwerya okeleliha ohoolo muthukumano, mmansihu. Mwaha wa yeeyo kintteeliw'aka murima woona wira woovira vakhani, mwaha wa yeeyo. Kookupali wira Apwiya anoonkhaliherya wira niire. [Muthukumano oniira, "Amen."—Mol.] Vano, moosuwela wira yookhala . . .

Annkisivela maatinistratoore aka. Kirina axinna oophenteya, Bosworth, Baxter, Lindsay, Moore, othene, aakhala athanu a yaawo, Baron von Blomberg. Awo atthu ooreerasa murima. Masi yookhala etthu emosa, wira nathukumana—ru nikhuru n'atthu, mmosa onkhalana etthu, mukina onkhalana ekina. Imaara sikina eyo ti yoovirikana n'itthu kinuupuwel'aka mmansaka. Tivo miyo—miyo—miyo kinoona wira kootaphuwa vano. Ninoowerya okhalana okathi muulupale, okhuna miyoono paahi, ohikattymiheya wira nilye. Kiniwuupuwelani nyuwo okhuna miyoono sanyu n'ukhalana o—okathi muulupale.

Bibilia aka oopacerya yaari ephattu. Miyo kimuxuntte Muluku muhina wa ephattu. Ni miyo okisivela omiserya. Moota onkisivel'aya omiserya! Ni nyuwo onnoosivelani omiserya, axaana? Woosivelakani omiserya, ni waaphenta ame anyu, munrowa okhala mmiravo mmosa ooreera murima. Hata orukunxa waka murima khokumin'he voomalela mwa miyo. Tivo nihiku nimosa kaari mmyaakoni, kimiseryaka. Vano, ela ti ya fayita paahi wa mwammirav'ola. Nto kiira kimiseryaka wu mmyaakoni . . . Nto w'axinamwane akina, vekeekhai, amphwanyaneya vaava. Nto miyo kaamiserya ihopa truuta. Nto, oh, ti yooreera okathi w'ephovo. Miyo kaamuwera siisaale, nto yaahikhala ehopa truuta ehimye ekina, moosuwela, siiso. Nto kaattotopelaka Apwiya ni kikhalanaka okathi w'ohakalala, kaanikhuwela. Imaara sikina, kaanimoroxa mukhoyi aka. Miyo kinnaamini okhuwela. Amen. Vekeekhai kinnaamini. Okhala wira, kooosuwela wira yookhala etthu enikivara, n'ukiiriha etthu paahi.

² Tivo kaamurowa vakhani voosiis'ule, nto okathi waatthik'aka, etthu yootikinihaxa: Khasireere ikhaya mapuro ale iwe, oNew Hampshire. Kookhalana nipuro naamukhaani n'oteka-vo muxaaxa weiwe, weiwo ommisery'aka-wo. Kaahikhalana eheema yaamukhaani yookoliwe, eheema yaamukhaani mwaakhal'aka-mo. Nto ekhaya yooriipa t'itthu yoothamaleya ekhanle. Vano, ekhaya maama n'axaana yaarookelasa memmo, khukakhanyulasa eheem'aka!

³ Vano, munuupuwela wira kaarowa wiirihani ekhay'ele, mwaarusi ule ottuli iwe ooxeerya maihi, ottuli iwe? Miyo vekeekhai kaahaana omutthara, nkaarina?

⁴ Masi yookhala etthu iiraly'awe. Owo aarookela, khupwanyula eheem'aka khumwaraxela ota itthu sothene, khulya yolya aka yothene kaarin'aka mme, vano oona oreera paahi. Vano varwiiy'aka, owo khurowa. Nto khunla awiihanaka axaan'awe, vano mwaaxaana mmosa khurowa ni yoowo. Nto mukina khaatthuna orowa; kuhala akilante-ene vaavale. Aakirukunuwenle ettuli, sa, ni aaniira etthu. Vano miyo nkaarina hat'etthu mmatatani mwaka woohikhala epaso yaamukhaani. Miyo kaaheetta kiikitthaka miri kamosa-kamosa sa sapukeiro vale. Ahe, owo khutthyawa ntoko, oh, kinoona mpakha nipotto nle na telefooni vate vale, khukilaathi. Owo khutturuma aihanaka ekhaya ela yaamukhaani, vano eyo hata ocaliwa. Khukhala ekilante-ene vaavale tu.

⁵ Miyo khuupuwela, "Mwaamukhaani ule oniirani?" Khwaattamela vakhiviru. Kaanoova omwaattamelaxa, omoova okiwarakhula. Nto—nto miyo—miyo nkaawerya woona mwiri, ni koosuwela wira n'uwo khaawerya owela. Tivo, ni nkaatthuna omwaattamelaxa, 'okhala wira kinnisuwela mukhalelo w'ekhaya. Vano, khwaattamela vakhaani paahi. Nto moosuwela yaakhumelenle?

⁶ Vano, okisivela mikatthe. Akavi wa nyuwo aximiravo sinaasivela mikatthe? Oh, wulu! Oh, miyo... Amiravo sinnaasivela, nave. Koowoona ovenxa matata. Hiyo othene sinninisivela mikatthe, ni miyo okisivela, ni okisivela ohela oravo. Kiry'aka muPatista, moosuwela, ti yeeyo ennikhaliha oratteene, moosuwela, oravoo, moosuwela. Tivo, ni mwiiwe, miyo nkinttonyerya, kinoopatisa pahi. Miyo kinooyeeherya mpakha okhala soosiva ni soolemelela. Miyo nkinittonyerya vakhani va ni vale. Kinnooyeeherya, kinikhaliha soosareya oravo sothene.

⁷ Vano nto, moosuwela, kaahikhalana mucoma mmosa waarina oravo vale, nuusu n'ekalawu ya oravo. Vano ikhaya sinnisiveliwa ni oravo. Tivo mwaamukhaani ula khukela mme khukumiha ettiyelo ya mucom'ole w'oravo, ni owo aakilante vaavale sa, ni mucom'ola mwaamukhaani w'oravo vathi va moonoo awe, sa. Owo aarina... Nto owo

khaasuwela moota w'olya, ntoko siniiriw'aya, moosuwela, tivo owo aakelih'awe ntata nawe n'ulata *siiso*, n'ulata. Vano khurukunuwa khukiweha, nto maitho awe makhaani othene yaahikhuneeleya, erukulu awe yaamukhaani yaari yootaphuwa ntoko saaweryaney'aya, ni oravo. Owo aakilanthe vale, akelihaka ntata nawe n'ulata oravo, *siisaale*, alataka ntoko saawery'awe.

⁸ Oh, wulu, miyo khuupuwela muthukumano wa khalayi wa Eroho Yowarya, okathi onthukul'ahu mucoma, khukeliha ntata nahu mmwaapuni n'ulata. Nnakelela, moosuwela, nilataka.

⁹ Ni moosuwela etthu xeeni yaari yootheiha, okathi ene yoowo? Nuumala mwaamukhaani ule olya vanci-ene ntoko saawery'awe, aahihiya mucoma vathi khurora atthyawaka iwe. Moosuwela yaakhumelenle? Ekhaya maama ni mwaamukhaani ule mukina khupacerya omulatas, ekumihaka oravo ene.

¹⁰ Vano, ahe, khino muthukumano ahu onrowa okhala *siiso*, kinniroromela, wira nitthikele naahimeeryaka akina, ni oвуwa wa Muluku onimorele. Vaareera.

¹¹ Kootteeliwa murima owoonani nyuwo anamwane. Okisivela wooleelani etthu *siiso*. Nto khino meelo oxekuwa, ninookhalana okathi wowaatta, ni—ni ninoowerya olavula vakhaani-tho. Nto ninrowa olavula n'apaapa ni amaama vano mwaha w'etthu emosa.

¹² Ninrowa olavula mwaha wa *Oxutta s'axetwani*. Mwa Masalmo 103:1 mpakha 3, ninsoma iversiikulu iya. Arumeyi anci-ene n'anamukuttho, wala anammusoma Bibilia, annisuwela seiyo vamurimani.

Mwaattotlopele APWIYA, O munep'aka: ni sothene siri mwa miyo, sivuwihe nsina naya noowaarya.

Mwaattotlopele APWIYA, O munep'aka, ni muhiliyale hata emosa wa soovaha saya:

Ti yaawo anlevelela sootheka sanyu sothene anvoniha iretta sanyu sothene;

¹³ Kintthuna wira nwehe vo, wira yaahikhala-vo “sothene.” “Yaawo anlevelela sootheka sanyu sothene, Yaawo anvoniha iretta sanyu sothene.” Vano nuuramihe muru okathi vakhani paahi.

¹⁴ Vano, Tithi a Wirimu, hiyo ninnooxukhuruni Nyuwo oxekuw'ola, mwaha w'okhala va. Hiyo ninnooxukhuruni Nyuwo mwaha w'anamwane ala axikhaani akilaathanse vaava, awo t'axilopwana a meelo, ni athiyana, nakhalaru nihiku na meelo, Yesu apisa vale. Nto vano, Tithi, hiyo ninvekela wira—wira Nyuwo munireerihe vano okathi onlavul'ahu vano Masu Anyu, ni mwaha wa nwanani muulupale hiyo orin'ahu, Satana. Hiyo ninnivekela, Muluku, wira Nyuwo munitthuniherye nikhale

omihooli wa, ekaruma y'ekhotto va, owerya wa Muluku, onrowa onvirikanya ohiy'ula mwa khula mpwaheryo onrow'awe wira, Pwiya, ni mmoonihе wira khorina ihaakhi ya malamulo nnakhala, wira Kristu oomuxintta opuro ahu iwe oKalvario, okathi Owo okhwiy'awe, ni Owo oowaakha makhulupale ni oomurula Satana khula—khula owerya waarin'awe. Nto, Muluku, munivahe ankhili ni wiiwa saana vano, wira nisuwele ni waataphulela atthu moota akhanly'aya osuwelaka moota wo ovonihiwa ni omuxintta Satana. Mwa Nsina na Yesu ninnivekela. Amen.

¹⁵ Vano mwa minuutu vakhani ninrowa olavula mwaha wa *Oxutta s'axetwani*. Vanniiwiwa vanci-ene ohimmwa axetwani. Vano, meelo oxekuwa khino ninoomaliha. Kaatthuna mahiku manli a esumana yeela, mwa khula enamuna, wira kilaleerye yeela, paahi. . . wala mahiku manli a miteko s'oxekuwa, wira kilavule yeela.

¹⁶ Vano, etthu yoopacerya, ele ekhanle xetwani. Vanniiwiwa atthu anci-ene olavula mwaha w'axetwani. Ahe, vano, “xetwani, munepa wootakhala,” sothene sinrwa mwa nuulumо nimosа, nto mw'Enkelesi oniihaniwa “namahooxa.” Mutthu onihooxa ti xetwani, ootakhala. Owo oniira. . . Vano, Bibilia olelo, w'anci-ene, w'atthu anci-ene, eliivuru ya khalayi apwaapu n'apiipi ansom'aya, wala etthu ntoko yeeyo. “Khiivo hat'etthu ya maana mwa yeeyo, ti y'atthu a khalayi, ni siiso.” Masi yoovonyeya. Ti y'atthu othene. Ni axetwani t'anamahooxa annihoоxa.

¹⁷ Vano, aakhala axetwani ankela mmunepani mwa mutthu, nto eyo ti, mwa moolumo, eyo yaarowa okhala—eyo yaarowa okhala mwa e. . . Nnya, miyo kaarowa ohimya ela, wira xetwani onkela mmunepani etthu enihooxa munepa.

¹⁸ Imaara sinci-ene vanniweryaneya omoona mutthu khino eelolo. Vano, pooti okhala mutthu orukunxale murima, oosareya Eroho Yowarya, nnya khukhala eelolo voomalela. Munnona? Eyo Ekeekhaii. Eyo kherina nnaata ni munepa. Owo namahooxa, moone, etthu enaahooxa.

¹⁹ Vano, iretta sothene, nihaana toko osuwela wira iretta sothene sinkhuma wa xetwani. Muluku kahiyo mwaneene iretta. Khiivo eretta enkhuma wa Muluku. Muluku imaara sikina onoomutthuniherya Satana ohela eretta mwa nyuwo, ntoko ewaxuxo wira yohokoloxeryeni mpaani mwa Muluku, okathi muhiniwelel'anyu. Masi eretta, mwa opacerya waya, ekhumme wa xetwani. Mwaamuwerya omutthokelela mutthu onaamini wira Muluku, Tith'ihu a Wirimu, aamukhala mwaneene etthu ntoko eretta ni okhwa? Ahe, nnari, Owo kahiyo, khonakhaleke, ni khankhalakhala akhalaka. Muluku onnitthuniherya eretta mwaha wo ohiiwelela. Muluku onnitthuniherya okhwa. Ntoko namalepa mmosa iiraly'awe, “Yothene okhwa onwery'aya wira, Muluku ookuruxa khuhela mukaaroni vano owo onniroiha

Ohoolo wa Muluku, mulipa-oowaamini.” Masi nuulumo *okhwa* nnihimya “ovalaanyiwa.”

²⁰ Yesu ohimye wira, “Ole oniiwa Masu Aka ni onimwaamini Ole okirumme, onookhalana Ekumi ehinimala.” Ni Owo oohimya, “Miyō ki ohihimuwa, Ekumi, ole onikaamini Miyō, hata anakhwaru, onookhala mukumi, ni ole orina ekumi ni onikaamini Miyō khankhwa-tho.” Nto hiyo ninnikuxa irutthu ya mmosa ni mukhw'awe mwa ereerelo ya mahiye ahu. “Masi owo khankhwa-tho.”

²¹ Vano nyuwo mwaweha vale okathi Owo aamuhimmy'awe Lasaro, Owo iirale, “Lasaro onoorupa.”

²² Awiixutti, atthu ntoko hiyo, awo khwira, “Oh, akhala wira onoorupa mukumii.” “Owo ohimye omumula,” etthu awo yuupuwel'aya.

²³ Masi Owo khurwa khwaaleela mwa malavulelo aya. Owo khwira, ““Ohookhwa, ele enaamini anyu. Masi,” khwira, “Miyō kinoorowa kamunxenxe, kamunxenxe.” Munnona? Munnona? Nyuwo mwakhala. . .

²⁴ *Okhwa* enihimya “ovalaanya.” Vano, vaankhanle wira mmosa wa nyuwo, mmosa a mw'emusini mwanu onimookhwa, wala etthu, owo ori, akhala-ru oorukunxa murima, owo khakhwiye. Ohookhwa mwa moonelo wa mutthu. Masi owo oroovalaana ni hiyo paahi, masi ori Ohoolo wa Muluku. Khakhwiye, ni khakhanle okhwaaka, ti yoohiweryaneya w'awo okhwa. Yesu ohimye wira, “Ole oniiwa Masu Aka ni onimwaamini Ole okirumme onookhalana Ekumi ehinimala, ni khamlamuliwa, masi oovira mookhwaani khuphwanya Ekumi.” Tivo, khokhanle okhwaaka. Etthu p'itthu ekhanle yoohikhwa, Ehinimala, khekhanle opweteyaka. Eyo Ekumi ehinipweteya. Owo ookhalana Yeeyo okhala wira Muluku oomuvaha. Ni kahi—kahi yoomuphwanela; ti ni. . .Ti voohitthuneya etthu. Muluku onoomuvaha yeeyo.

²⁵ Muluku onniihana. Khaavo onwerya orwa wa Muluku ahikhanle wira Muluku oroomwiihana. Yesu oohimya, “Khaavo onwerya orwa wa Miyō ehikhanle wira Atithi Aka anoomwiihana, anoomuruuha.” Ekeekhai? Tivo ti Muluku mwa othene. Khino meelo oxeukuwa ninoohimya voowaatta vakhani yeeyo, 'okhala wira kintthuna kiruuhe etthu ila ya *eretta*, wa nyuwo, wira nyuwo moone eyo.

²⁶ Waahikhala okathi waakhanly'ahu erukuruku mwa muhaapwaapu ahu. Nyuwo moosuwela eyo. Meetiku onnisuwela eyo. Ahe, nyuwo, nave, nyuwo anammusoma Bibilia. Moosuwela wira eropo y'ekumi epacenrye mwa muhapwaapu anyu, okhala eurukuruku, nto khurwa eviraka mw'apwaapu anyu, vano mpakha mw'atithi anyu, nto mpakha mw'ame anyu ni vatthu vary'anyu vano. Ti yeeyo. Yoolempwa hata enniixuttiha yeeyo. Va eri Yoolempwa wa nyuwo mwatthuna vale. Kookupali wira

ehimmye wira Levi aahiliva sanamuloko okathi waary'awe mmuthanani mwa Abrahamu, yoowo aari muhapwaapu awe. Ekeekhai? Tivo, moone, eropo yaakhanle ottuli wu.

27 Masi minepa sanyu sipakiwe ohinatthi opattuxiwa olumwenku, okathi Muluku aamupattunx'awe mutthu ailattanihaka Yoowo Mwaneene; erooho ya mutthu; kahi mutthu *mmosa* ailattanihaka Yoowo Mwaneene, masi *mutthu* ailattanihaka Yoowo Mwaneene. Munnona? Vano nto Owo aahaapaka mulopwana ni muthiyana, Owo ahinatthi otoko okhalana mutthu mutthayani w'elapo ya vathi. Kaanithuna nikhalanne okathi oxekuw'ola, okuxa okathi ahu n'utthikela yeeyo. Moone paahi moota Muluku . . . Vano, eri muhina-muhina, masi, moona vale, eyo enoorwa muhina mwene. Munnona? Moota Muluku, ottuli wopaceryani, etthu Owo iiraly'awe wu, ni moota Owo aakhuruwenly'awe vathi ni moota Owo aamupank'awe mutthu ailattanihaka Yoowo; vano nto Muluku khurukunuwa khupakiwa alattanihiwaka mutthu, wira amoopole mutthu.

28 Vano, okathi Muluku omupank'awe mutthu ailattanihaka Yoowo, owo aari erooho mutthu. Vano nto khaakhanle mutthu wira alimeke etthaya. Nto Owo khumpattuxa mutthu vatthayani w'elapo ya vathi. Vano, alipa-oothokosa okathi, n'akina, n'atthu ala amphavelasa n'ukuxa makhuva a khalayi, ni sikina, ni anaamini epwaheryo . . . Miyo kinaamini enamuna y'ekeekhai y'epwaheryo. Mutthu onnipwaha mmansawe, masi kahi othene mwa erukuruku emosa. Nnari, mulopwana, okhala wira mwa—mwaapalame onkhala mwaapalame okhuma okathi Muluku omupank'awe mwaapalame, ni khole onkhala khole, mutthu onkhala mutthu. Ti yeeyo.

29 Vano, miyo kaalavula ni meetiku mmosa nno woovira okathi vakhani, oLouisville. Owo khwira, “Vano, Reverendu Branham!” Miyo kaalavula mwaha w'atthu a wAfrika, moota anly'aya, anoorowa paahi mwa . . . Oh, etthu emosa mwa soowoopiha sitonko woooniwa, moota awo anly'aya! Ankuxa itthu sikhanle soohononeya, axiitthu mwa seiyo, n'utatha paahi, axiitthu ni sothene. Khivanvirikana w'awo. Munnona? Awo yiira . . . Owurya etthu p'itthu, khivanvirikana wira exeenii. Owo khwira, “Masi, Reverendu Branham, atthu ale kahiyu atthu.”

Miyo khwira, “Oh, ayo, ti yaawo. Vekeekhai awo atthuu.”

30 Miyo khwira, “Etthu enlikanexa ni mutthu, mwa mixovo sa inama, ti elumpa. Ni nyuwo muneererya iyaakha ikonto xexe okumiha ottukutta mw'elumpa yeeyo, nave khenwerya,” Miyo khwira, “okhala wira khenwerya wuupuwela. Eyo kherina hat'etthu yo wuupuwela-no.” Oh, pooti oxuttihiwa itthu sikhaani ntoko ekhavalu, moonu wolopwana ni woohiyana, wala owara iyookhola, wala onvura sikaro, wala wiikhaliherya vamucinkani, weettiha ekhavalu, wala etthu ntoko yeeyo, masi eri paahi ntoko moonu “woolopwana” ni “woohiyana” wiirela

ekhavalo, wala “wheet” wa mwalapwa, wala etthu ntoko yeeyo. Miyo khwira, “Owo mwaaxinama.”

31 “Masi mukihye kirowe wAfrika, nihimo nookhalexa na mutakhwani awo arinas'aya, ni nlo nihimo naamukhaani na nammuhuruni.” Nto miyo khwira, “Alakela a muhapwaapu aya apwaapu aya apwaapu aya apwaapu aya apwaapu aya khanatoko omoona mukunya wala hat'etthu. Etthu ene emosa paahi onsuwel'awe, owo hata khonsuwela ti nvi nikhanle ntata noolopwana ni noothiyana. Etthu ene emosa tu onsuwel'awe olya, ni onlya etthu onwery'awe okhalana mmatatani, yakhala enama ya mutthu, etthu ekina, khivanvirikana wa yoowo, vakhalaru wira onimoolya. Masi mukihye kimukuxe arine-ene iyaakha thanu, vano mwa iyaakha muloko ni thanu onoolavula Enkelesi vooreera n'ukhalana olakeya wooreera. Mwaha wa xeeni? Owo ookhalana munepa. Muluku omupanke mutthu, ni owo ookhalana ehaakhi saana yo wiiwa Ehapari yooreera, nnakhala emaara emosa mano, ntoko sirin'ahu waalaleerya, atthu nno, wAmerika wothene, imaara sinci-ene, ni waavara metto, waakhanererya ni sothene. Mmuhiye aiwe emaara emosa, nto munwehe akhuwelaka ni otthimakela waltaari vowaakuvaxa.” Munnona? Ayo, mulopwana!

32 Ti siiso ory'aya murim'aka, munna, olelo, okathi onuupuwel'aka wAfrika, ni matat'ale ooriipa oohaawaseya avenxiwaka, yiiraka, “Munna Branham, emaara emosa-tho sa Yesu!” Oh, ikharari! Yookhala etthu mwa miyo enthamuwa ni okiviha. Kimalakaru ophwanya musurukhu oniphiyerya, kinrowa wuuwu, nave. Ti yeeyo kiniirih'aka khula esentavo kimpwany'aka, sothene, Muluku onnisuwela, ohiya ele enly'aka paahi. Ni atthu anci-ene annikivaha ikuwo soowara. Ni ele enikiphiyerya paahi wira kikhaleke, yoomi, n'ile enwery'aka, kinrihelela mmusurukhuni w'omisiyonaariyu kuveerunu ovahenry'awe. Nkinliva hata mpoositu wa soophwanya wa yoowo. Mpakha othukumanya itoolare, ikonto tthaaru xexe wala thanu, ni kinooroiha iwe ni waalaleerya Ehapari yooreera atthu kinsuwel'aka wira nihiku nenlo kihaana waakhula. Ni kinoosuwela etthu yo waakhula.

33 Miyo kaaniiraka, karowaru epooma emosa, kaanikhalanaka muthukumano muulupale khalayi okathi awo yaakhalan'aya musurukhu wowaatta, ni yaakhalanaka ikampaanya sulupale ni itoolare ikonto sene, kaanivahaka oKruzuxu Vermeelya ni sikina. Vano, vano, kahi owuulumela, masi okhuruwela ephiro mukaaroni ya itoolare ikonto xexe, ni ipitawu sa maluku oowaarya mwa yeeyo, anvuraka sikaro, ni itoolare imiya thanu khula esumana vamusurukhu atthu anwereiwa-. . .Nnari mulopwana! Nnari, vekeekhai! Ni mwa yaala, mukhumakaru epooma eyo, eniiriwa, “masantu oophirikeya,” ni itthu sothene siiso, ni eveehaka, eyevihaka etiini hiyo ninaakihery'ahu. Nnari, mulopwana!

³⁴ Miyo kinookuxa, ni oholo wa Muluku ntoko Mphuki aka, kinihelela muteko wa Ehapari yooreera okhopela, tivo koosuwela wira Nihiku nlo wira kino...okathi orin'aka waakhula mwaha wa muteko aka wa murumeyi, onoovahereriwa oratteene. Vekeekhai ti yeeyo, 'okhala wira kinnisuwela wira ntoko siniweettel'aka atthu kinimweettela Muluku. Mweettelo aka paahi wa nyuwo ti mweettelo aka wa Kristu. Ni mweettelo anyu wa miyo ti etthu emosaru, ti yeeyo, wa Kristu.

³⁵ Vano, owoona atthu siiso, ni woona moota mutthu, nto, ni munepa ohinookhwa vano, ohikhanle okhwaaka, ohikhanle opweteyaka, ohikhanle wira hat'etthu woohikhala okhalana Ekumi ehinimala, Muluku veeyuulupale awe, vootthuna Wawe Mwaneene, oovahaly'aweni. Nto vano, nto, vano miyo... .

³⁶ Mukihiye kilakiherye ela vakhani, wala kihimye etthu. Mutthu onrowa okhuma ni wira, "Munna Branham Calvinista." Nnari, nkihiyo. Ka Calvinista vakhalaru wira Calvinista ori mBibiliani. Masi okathi Calvinista onikhum'awe mBibiliani, weso ki Arminiyaano, moone. Kinnaamini ereerelo murima ni kinnaamini oKalvinista, nave. Masi, oowanli aya, mmosa orootthara erintta khurowa epantte *ela* nno, ni mmosa orootthara erintta khurowa epantti *ile* iwe. Vahaakhanle mwaha w'Eliivuru y'aEfeso, ohokoloxa n'uhela nipuro nooloka vaavo Muluku ohenly'awe, othene naarowa okhala ootepanyeya voomalela. Masi oowanli aya aakhalana mwiixuttiho, masi animwiihonona mwa yoowo, khula mmosa, awo t'ale eererelo murima ni aKalvinista, nave, mArminiyaano. Vano, aKalvinista aakhalana etthu ekeekhai. Miyo kinnaamini yeeyo, wira mwiixuttiho w'eKalvinista... .

³⁷ Miyo kinnaamini ila. Nroromelo, kinnaamini wira Ekereja yookhalana Nroromelo Ohinimala. Khula musomi a Bibilia onnisuwela eyo, 'okhala wira Muluku oohimya wira Eyo yaamukhumelela yoohitheka wu. Eyo ekeekhai? Nto, Eyo enoorowa okhala iwe. Eyo ekeekhai? Bi...Ekereja ti yoolipihiwa Voohimala. Vano, mwakhala Mukereja, t'itthu enttharelana. Mwakhala Mukereja, vaareera, muri oolipa ni Ekereja, masi vanreerela mukhale Mukereja. Ni munkela sayi Mukereja? Mwaha w'ovahana matata? Nnari. Ohela nsina nanyu muliivuruni? Nnari, mulopwana. "Mwa Eroho emosaru hiyo othene noopatisiwa mw'Erutthu emosaru." Nto Erutthu iyo, Muluku olamunly'awe oKalvario, yaari Erutthu ya Yesu Kristu, nto nimpatisiwa mw'Erutthuni memmo mwa Eroho emosaru. Nookhalana Nroromelo Ohinimala naakhalakaru mw'Erutthuni mwa Kristu, khiivo enwerya onimwalaniha, khiivo ennikwanyanya. Mwakhuma vale, munikhuma n'utthuna wanyu mmansinyu. Masi vekeekhaixa ntoko, mwakhalaru mw'Erutthuni mwa Kristu, siiso ntoko Yesu ohihimuwaly'awe mw'alipa-ookhwa, nyuwo munoohihimuwa nave. Muluku ohiira yeeyo. Owo... .

38 Khamukhanle otthekaka. Oh, nyuwo... Khino miyo pooti okhala natampi mwa woona wanyu, masi kakhalaru mwa Kristu, Muluku khonoona eyo, okhala wira itampi sawe sinnittipiha... Ephome Awe ennittipiha itampi saka vale. Munnona? Nkikhanle otthekaka. "Ole oniyariwa ni Muluku khaniira etampi, maana khokhanle wira etampi. Epyo ya Muluku enkhala mwa yoowo." Munnona? Owo, oolikanana, owo avonya vale, vekeekhai, okathi ene yoole oolikanana wira alape. Owo akhala muKristu eekeekhai, onimwiira. Ahalanaru, owo onooniherya wira khorina hat'etthu, opacerya wene. Eyo Ekeekhaii. Owo khorina hat'etthu, opacerya wene. Masi akhalaru muKristu eekeekhai... .

39 Vaava va, enaaliwa enuku y'etriku mutthayani, eyo enrowa okhala enuku y'etriku okathi wothene. Miiwa khino pooti orukurerya, n'itthu sothene sikina, masi enrowa okhala enuku y'etriku yaakhalakaru. Ekeekhaii? Ni vekeekhai mutthu ayariwaru vasya ni Eroho ya Muluku, owo khaniira okela n'ukhuma, ni nno ni nno, ni molumwenkuni mmo ni nno. Nnari, mulopwana. Nnari, nnari. Khamunkhala mwiiwa nihiku nimosana nave enuku y'etriku mmeeloni mwaya. Muluku khorina eyo mmatta. Ayo, mulopwana. Mwayariwaru ni Eroho ya Muluku, mwa muKristu okhuma okathi yoowo mpakha e... .mpakha nyuwo orowa, vano nto nyuwo mwa—nyuwo mwa oohikhwa, ni Muluku. Eyo ekeekhaii, mwakhalaru Mukereja.

40 Vano, nrowe nilavule epantte ya mookhwaani. Vano, moota xeeni mutthu mwa mukhalelo owo, mwa enamuna yeeyo ya mukhalelo, okhalakhala awereiwaka? Okhala wira erutthu anyu nlelo khenatthi woopoliwa. Erutthu anyu khayoopoliwe. Hata wira moota xeeni, moota xeeni mury'anyu ooreera murima, ni ereerelo murima xeeni, ni owaarya xeeni, ni Eroho Yowarya eniphiyerya yayi, owo munep'anyu paahi. Vano munep'anyu khunatthi omalela nlelo. Owo orina Eparakha paahi, natiri a Muluku, yoowo okhanle neemexeryo no woopoliwa wahu. Masi vano naahikhalaneru nemexeryo na ohihimuwa wahu, nnakhala ovoniha wa Muluku, nto nkinkhalana hata nroromelo wala etthu wira ekooniherye wira wookhala ohihimuwa.

41 Vekeekhai ntoko wira Kristu aahikhaleke mmurimani mwaka, vakhala wira kihaana okumiha eyo mwa enamuna emosa—emosa y'etthu ya psikoloxiia ottuli wu, okhala oowaamini etthu ntoko yeeyo, ahe, nto miyo—miyo—miyo kaamuhoverya vakhani yeeyo. Nto mwaha wa yeeyo, wAfrika, awo jaarwaaka, va anoorwa arummwa, jaaruuha atthu ale a weiwo ikonto sene, ni yaakunxe-ene amuluku aya eethiru ootoppe ni sothene sikina, okhala wira awo yiiwale paahi epantte y'ankhili wa Bibilia. Eyo Ekeekhaii. Nto ekerej'aka yoomi ti Patista, Metotista, Prespiteriyaano, sothene sironwe iwe. Masi okathi awo yoonaly'aya owerya wa Muluku orwa

wooniheriwaka, eyo yaahimaliha mwaha, yaahisuwela nto wira Muluku aari Mulukuu.

⁴² Masi, vano, exeeni empaceriha erett'ela? Vano, etthu yoopacerya, eyo enkhala erooho ehinatthi okhala eretta, siiso ntoko nyuwo mwaary'anyu erooho muhinatthi okhala mutthu. Vano kinrowa omukuxa Munna Willet va ntoko nthoonyeryo. Munna Willett, miyo . . . Waahikhala okathi mmosa nyuwo ni miyo nahaakhanly'ahu hat'etthu. Vano nto etthu yoopacerya, Muluku khunivaha ekumi. Nto nrowe nikuxe, niire, kapwanyulasa erutthu anyu oxekuw'ola, mupakiwe ni nikhuru na irukuruku, sinkhalihwa vamosa ni aatomu. Nto vano, nihiku nimosa aatomu awo anoopwanyuliwa, Yesu apisa vale. Nyuwo munootthika. Awo anookhala ntoko yaary'aya wopaceryani, otthikela musulu. Masi erooho anyu yahokolowa, aatomu awo anrowa okhala-tho vamosa n'irooho yeela emukumiherye Munna Willet mukina oolikana saana ni yoole, mmiravo paahi, okathi waary'awe vooreera wawe.

⁴³ Mutthu avikanaru iyaakha soophiyaka miloko miili ni thanu, owo omphwanya mannyaari kamosa-kamosa vathi va maithe awe, ni maihi kamosa-kamosa oottweelela ekhumelaka. Enoorowa okhala, 'okhala wira okhwa ori ottuli wanyu. Nto nihiku nlo onoorowa wookuxani. Hata wira nyuwo mw'ani, onoorowa wookuxani. Masi owo vakhani-vakhani . . . Munoophiya vanlothoni va, nto Muluku onimookumihani vanlothoni vo, vano mumphwanyaneya nlotho nla *nno*, okhwa onoo halela woovarani, ni nno, masi nuuvira okathi vakhani onimoo varani. Masi nto, etthu okhwa onwery'aya wira, owo onoo phwanyani ni sothene orin'aya ihaakhi, vano nto va . . . vaniir'aya sothene onwery'aya wira . . . Okathi Muluku oovanh'aweni ekumi ila, ni nyuwo mwaari vooreera wanyu, oophiyaka miloko miili ni tthaaru, mwaphiyaru woohihimuwani munrowa otthika siiso ntoko saary'anyu okathi waarin'anyu iyaakha miloko miili ni tthaaru, miloko miili ni thanu, 'okhwa ohinatthi okela. Okhwa onoorowa wira sothene onwery'aya wira. Owo onookela mmo, masi munootthika siiso ntoko mwaary'anyu.

⁴⁴ Vano, khula emosa ya—ya irukuruku sanyu mw'erutthuni mwanyu, ninrowa opwanyulasa naanaano va, munkuxa erukuruku t'irukuruku, erukuruku t'irukuruku, khupweha yeeyo vaplataforma va, nuumala khula erukuruku mw'erutthuni mwanyu, munoo phiyerya eropo yaamukhaani vaavo vapacenry'anyu, ehinweryaneya woona nniitho n'ephattu. Muhaana oweha ni iyookhola soowuncererya. Miyo kootoko woona eropo y'ekumi ni emikroskoopiyu. Enkhala ntoko nliinya naamukhaani. Nto etthu yoopacerya empacerya enkhala vamuthanani, enkhala ntoko nlutte naamukhaani. Eyo t'irukuruku yoopacerya enthukumana vasulu v'erukuruku.

45 Vano, vaakhanle wira kaahaana okuxa erukuruku yeele yaamukhaani yeeyo khula mmosa a nyuwo mukhummy'anyu-vo, erukuruku yaamukhaani, eropo...Eropo exeenii? Eropo t'irukuruku yaamukhaani, erukuruku yooyevexa. Ahe, exeeni enrwa numala yeeyo? Vano, miyo kihoopwanyulani khula nipattuuxa na nyuwo, mpakha erukuruku ila yaamukhaani, ni nlelo nkinatthi woophwanyani. Kinoomalaru omwarya irukuruku sanyu. Ahe, nto, etthu enttharelana, irukuruku s'ephome, n'irukuruku s'erutthu, ni sinakhaleru etthu p'itthu, kimwaryaka va, masi nlelo nkinatthi woophwanyani. Vano, enikihaleela eropo emosa vano. Ahe, kinrowa okawanya erukuruku yeeyo yaamukhaani. Vano, muri vayi? Ekumi anyu. Nto ekumi enkhaliha erukuruku aya yoopacerya, yeeyo yaari eropo, nto sothene ntoko mukhalelo aya; mwalapwa ntoko mwalapwa, mwaapalame ntoko mwaapalame, mutthu ntoko mutthu. Irukuruku sinnuwaka, erukuruku vasulu v'erukuruku, erukuruku vasulu v'erukuruku, sinoorwa mpakha vathu vamphwanyaney'anyu, mutthu, irukuruku sininnuwa. Vano, eyo ekhalihiwe ni Muluku wira ekhale siiso.

46 Masi, vano, ankhi kankuru? Nrowe nimuhimye yoowo vakhani. Vano, Muluku ohoovahani ekumi anyu. Nto niireke, nyuwo muri va olelo, miyo kiri va, khiivo—khiivo hat'etthu mmatatani mwaka, masi pooti okhala kankuru vantatani vaka nihiku nlo. Ahe, kankuru uwo okenle sayi vo? Nrowe noone ele ekhanle kankuru uwo, vano nrowe nimukawanye, nrowe nimukuxe. Vano, nlo nikhuru na irukuruku, nave. Nyuwo mwaanisuwela yeeyo? Nipotthe, mwaana mmaithoni, khula emosa wa ithu seiyo irukuruku. Khasirina mukhalelo. Kamosa-kamosa wa seiyo sinoomwareya, nto sikina sinkhala ntoko ranttaasi, ni sikina sinkhala ntoko...ekhulula yoorekama, kankuru ooxeerya, siiso ntoko mikhoyi soorekama sooxeerya sinvira muhina mwa... Vano nto ookhala kankuru ookhwila voolimaleleya onkhuma vanipeleni va muthiyana, onkhala ntoko mikatthe sinkhala emosa vasulu v'ekhw'aya, vano nto n'umwaramwareya. Ni sinninnuwa khula nipuro.

47 Imaara sikina mapotthe t'othetemana, sa, soorekama, soottaiva, ni sothene. Iyo khasirina mukhalelo, okhala wira siri ntoko erooho ehinkhalana mukhalelo. Masi wunnuwa wa irukuruku. Nlo nikhuru na irukuruku, niireke, mwa nyuwo naanaano va nookhala nipotthe wala kankuru, sinkumiherya irukuruku, sininnuwa, sinnuwaka, sinnuwaka. Sinimoolya, sinnuula ekumi mwa nyuwo. Sinkhala sikumi mwaha w'ephome mw'erutthuni. Aana a niitho ankuxa enaphinaphi ya mmaithoni ni wunnuwa vasulu vaya, khukhuneela, khutthuka maitho anyu. Sikina sinimoorwa nave khasinkhala-tho...ntoko elapaha, enrwa m'weroponi yaamukhaani paahi. Khiivo hat'etthu ya naata ni wunnuwa waya. Munnuwelo mmosaru w'erukuruku

empaka ethepo, ennimupaka tte—ttenhamya. Munnona? Kherina naata ni munnuwelo w'eropo.

⁴⁸ Ni sikina sinkhalana mukhalelo w'erutthu, sikina khasimphierya sikhalanaka. Ni sikina khasimphierya okela m'werukurukuni. Sikina sinkhala erooho, snihooxa munepa. Ninoophiya vaavo, kinoohiya nipuro nlo nikhale na meelo oxekuwa, kawerya vale, vaavo munepa-erooho ole onrw'aya, ni moota ntoko *va*.

⁴⁹ Nto vano, apatthani, nkinihimya ela wa enamuna emosa ya pisikoloxiyya. Miyo kinnikumanaka n'axetwani mwa iyaakha, ni nyuwo munnisuwela eyo. Vaakhanle wira mano munoosuwela etthu ene, vammal'aya miteko ophiya okhomoni ohiyu, etthu enkhumelela imaara sikina. Nyuwo khamunsuwela. Muupuwele, mwaarowelaka erooho, vanreerela musuwele etthu enlavul'anyu. Muheemele vale paahi munanyakulasa, 'okhala wira khenrowa ophwanyiha etthu. Masi okathi xetwani orin'awe owiwelelani, owo onoosuwela. Kahi wiituperya xeeni munikhuwel'anyu, kahi eyaattelo xeeni ya makhura munoot'anyu. T'ile eri nno owo onrow'awe osuwela, Ekeekhai. Yesu aaroomwiwela paahi, "Khuma."

⁵⁰ Muupuwele, awiixutti yaahiriha munyethe n'uripithuwa, etthunaka oomomola, ni itthu sothene. Awo khwira, "Mwaha wa xeeni hiyo nahaawery'ahu oomomola?"

Khwira, "Mwaha, wo ohaamini wanyu."

⁵¹ Khwira, "Mmukhume." Mmiravo khumora khumphwanya ettetemero yootepexa yaatonko omuphwanya. Munnona? Munnona? Awo yaahisuwela owerya.

⁵² Nkaawehaseni amiravo ale iwe, anamweettasa pure ale yaamoonale Paulo awoomolaka axetwani. Awo khwira, "Hiyo ninoowerya wira etthu emosaru," aana a namukuttho mmosa. Vano awo khurawasa khwira, "Hiyo ninniweya owoomola axetwani." Miteko 19. Awo khurawasa wa mulopwana mmosa aamoraka ecile, nto khwira, "Hiyo ninnoovirikanyani, mwa Yesu. Mmukhume owo..." Xetwani khwira, "Vano..." ". . .mwa Nsina na Yesu, yoowo Paulo onimulaley'awe!"

⁵³ Xetwani khwira, "Vano, miyo kinnimusuwela Yesu ni kinnimusuwela Paulo, masi nyuwo mw'ani?" Moosuwela yaakhumelenle. Khimutuphela mulopwan'owo, khukhera ikuwo saya, vano yaawo ene ti yaamoramonre, khutthyawela mphironi.

⁵⁴ Axetwani ene yaawo aakhala olelo, tivo ohireery'aya okhala onamathipelela. Ela ekereja, ohiyu yoola. Khureere onamathipelela mulaponi olelo, oniihaniwa ovoniha wa Muluku, waahaana omaalihiwa. Ti yeeyo enruuha oveehiwa wa Niwoko neekeekhai. Tivo muhireeren'anyu mukattyamiho muulupale. Khasireere itthu siniihaniwa etiini, olelo, saahaana omaalihiwa. [Nipuro vahiitthu mufiitani—Mol.] Hat'etthu woohikhala maloko! Ti yeeyo eniiriha Ekereja y'ekeekhai ya

Muluku okhalana mukattyamiho muulupale ni yeeyo. Masi hiyo n'Amerika, moone, eyo t'inamuna y'okhala. Muluku onihimya wira etriku ni malaxi oopuruleya ni miiwa yaannuwanse vamosa. Muheererye ophela. Muhiye sinnuwe vamosa, masi ni mihokorokho saya sinnisuweliwa. Saahikhale mihokorokho, vano, khiivo Ekumi, khiivo hat'etthu vo.

⁵⁵ Vano, nkawehani erukuruku ila. Niire, ntoko nlikanyiho, ntoko imaara sinci-ene, kankuru ooxeerya voolimaleleya oniphwanya erukulu ya muthiyana, makhwatta a othiyana ni sikina. Vano eyo, nrowe nikuxe yeeyo, yootakhala yeeyo vano, mwa erukuruku aya, ola—kankuru ula. Vano kankuru. . .

⁵⁶ Sothene mwa erutthu sinthoonyerya sa erooho. Nyuwo munnisuwela yeeyo? Sothene mwa erutthu sinthoonyerya ya erooho, voochicala.

⁵⁷ Mwa nlikanyiho, ntoko ela, okathi—okathi oniyariw'ahu mw'Erutthuni mwa Kristu, sookhala itthu tthaaru sintthuneya wira siruue Oyariwa wahu. Vano iyo t'itthu tthaaru saakhumme mw'ekumini ya Kristu okathi Owo okhwiw'awe. Saahikhuma mw'erutthuni mwAwe, maasi, Ephome, Eroho. Eyo ekeekhai? [Muthukumano oniira, "Ekeekhai."—Mol.] Itthu tthaaru, t'itthu seiyo tthaaru hiyo onivir'ahu—mo okathi oniyariw'ahu vasya: okhalihwiwa naxariya, oreerihwiwa, opatiiso wa Eroho Yowarya. Vano, pooti sothene okhala mwa mwiiraneyo mmosa. Masi entthuneya. . . Masi vanniweryaneya nyuwo okhala mmukhaleloni mwa okhalihwiwa naxariya muhikhanle ooreerihwiwa. Vanniweryaneya nyuwo omwaamini Pwiya Yesu Kristu nave nlelo munakuxa soonanara sanyu. Masi vanniweryaneya voomalela nyuwo okhala mwa makhalelo ookhalihwiwa naxariya ni ooreera, nto muhirina Eroho Yowarya. Moone, Bibilia, Yohani Oopacerya 5:7, oohimya, "Ari araru ankhalela onamoona Wirimu, Tithi, Mwaana, ni Eroho Yowarya, ni. . . Tithi, Masu, ni Eroho Yowarya," yoowo aari Mwaana, "nto ooraaru ala ari mmosaru. Ni aakhala araru ankhalela onamoona vathi, maasi, Ephome, ni Eroho, nto ooraaru awo anniiwanana vamosaru." Kahi mmosa, masi anniiwanana vamosaru. Khamukhanle okhalana Tithi muhirina Mwaana; khamukhanle okhalana Mwaana muhikhalanne Eroho Yowarya, maana awo t'ohivalaanyiheya, mmosaru. Oraaru ari mwa mmosaru.

⁵⁸ Nkiniwiwa yeeyo nno, masi vanniwaneya vanci-ene mulaponi, emosa wa itthu suulupalexwa mwa makhuru a aPentekosite, evitikavitika mw'etthu yookhweya. Ni kaahikhala ni makhulupale aya vamosa khuwooniheryasa wira oowanli aya anaamini etthu emosa. Owo xetwani eriyari aya, ti yeeyo tu. Vaakhanle wira ekerej'eyo yuulupale ya Pentekosite yaamu-. . . yaamuhiya ilimalelo iye sikhaani, sa khalayi khwiiraana vamosa mwa Ekereja emosa yooreerihwiwa ya Muluku, Okuxiwa waamurwa. Masi vakhalaru wira Satana

onniwerya waakawanya, vaareera. Eyo t'inamuna awe yo wira. Ni awo anaamini etthu emosaru mara.

Mmosa iira, "Ahe, *ela t'Ile.*"

⁵⁹ Miyo khwira, "Ahe, *ela* yakhala Ele, weso Ele *t'ila.*" Nto eyo eri vo. Vano, yothene etthu emosaru. Masi eyo vo, mwa oraaru ule wa araru wa Muluku. Vano, vano, Muluku mwa omosa Awe. Muluku Tithi, Mwaana, ni Eroho Yowarya. Vano, hiyo khaniniira "amuluku ahu," ntoko apakawu. Ti "Muluku ahu." Munnona? Ti mukhalelo wa oraaru wa Muluku.

⁶⁰ Vano nwehe, vano, Satana ori mwa oraaru nave. Ni ikuru sawe siri mwa oraaru.

⁶¹ Vano, masi nwehe nto okathi maasi, Ephome ni Eroho sinkumihery'aya Oyariwa vasya. Eyo ekeekhaii? Vano nwehe. Ti yeeyo enthoonyerya Oyariwa vasya. Exeeni enthoonyerya oyariwa w'ephattu ohinatthi orwa Oyariwa vasya? Okathi. . . Nyuwo aximai, okathi oniyariw'awe mwaana, exeeni ekhanle etthu yoopacerya? Maasi. Enttharelana, ephome. Enttharelana, moone, eyo ennikhaliha ekumi, moone, enimupaka mutthu. Maasi, ephome, erooho.

⁶² Vano, kankuru, nrowe nimuhimye yoowo voottharelana. Nookhalana minuutu soophiyaka mithanu sihanle, woona waka. Minuutu soophiyaka mithanu sinttharelana, nrowe nimuhimye kankuru. Exeeni yootakhala eyo? Eyo enthoonyerya exeeni? Owo ti nanama. Owo onmuthoonyerya marepo, onlya ithu soowuntta. Vano kankuru onkhuma mwa ovulala, imaara sinciene, vaavo erukuruku etuthuliw'aya nto eyo—khuthikileya. Nto erukuruku yaamukhaani memmo enikhala yo wiivalula. Oh, nlo nuulumo nuulupale wa muPatista, khanihiyo? Vaareera, masi eyo enimwiivalula, erukuruku iyo. Miyo ka muPatista onaamini wiivalula.

⁶³ Ookhala mutthu iirale, vamuthukumanoni nno wArkansas nihiku nimosa, khwira, "Munna Branham," khwira. . . Aari mutthu mmosa muNasareeno. Owo aaroonihiwa. Aahikhalana yawawe. . . Eettasaka opooma, n'attootto awe vanikhatani. Owo khwira, "Moosuwela?" Khwira, "Emaara yoopacerya orwa va," khwira, "Miyo—miyo koono wira nyuwo. . . owiiwani olaleya, koono wira mwaari muNasareeno." Owo khwira, "Vano kaahoono wira atthu anci-ene aPentekosite, nto mutthu mmosa khukileela wira mwaari muPentekosite. Nto vano muniira wira mwa muPatista." Khwira, "Nkinsuwela saana."

⁶⁴ Miyo khwira, "Oh, ti yookhweya." Miyo khwira, "Miyo ka muPentekosite muNasareeno, muPatista." Tivo ti—ti yeeyo. Vaareera. Nnari, hiyo na mmosaru mwa Kristu Yesu, mwa Eroho Yowarya ennikhaliha mmosaru. Ti yeeyo.

⁶⁵ Vano, nwehe, erukuruku ila yaamukhaani enimwiivalula okathi enthikiley'aya. Enipacerya ekhaani. Iropo sikina sikhaani sinoothimaka wira sivahe ekumi vaavo. Ni ti siiso oru

onikhum'aya vanikhwattani. Ankhala anatoropa axikhaani anwana mwaha w'ekumi anyu. Awo anootthyawela iwe n'u—n'utuphela evenenu ile, ikuru iye s'axetwani sineererya—sineererya othukumana mme, n'uvaha ekumi aya. Ti yeeyo eniira. . . Eyo ti. . . Awo nikhuru n'anatoropa axikhaani ookhwa, oru ule ori mphomeni mwanyu. . . ori va—vanikhwattani, sinvaha ikumi saya wira soopole yawinyu.

⁶⁶ Vano, okathi erukuruku yaamukhaani enikhott'aya mmo vano xetwani ula khupacerya, owo onoopacerya wunnuwa, onoopacerya wuncererya irukuruku. Owo ompaka erutthu siiso ntoko an'inyu ampacery'aya mmirimani mwanyu, ni ntoko siiraly'anyu mw'ame anyu. Erukuruku vasulu v'erukuruku, erukuruku vasulu v'erukuruku, erukuruku, khula enamuna, khula nipuro; paahi, khasirina mukhalelo wa hat'etthu ntoko mutthu, ntoko mukhalelo awe. Enkhuma mwa erooho paahi. Enimunnuwa paahi khula enamuna, ni enoopacerya erukuruku vasulu v'erukuruku, erukuruku vasulu v'erukuruku.

⁶⁷ Nto vano, etthu yoopacerya enoonaneya, munoopacerya otteetheya n'uwereywa. Munoorowa wa meetiku owo onimoowehawehani mw'erutthuni. Khino khonwerya ophwanya. Aphwanya vale, khino onoothikila. Awerya vale okumiha oratteene, vaareera, oowerya. Masi aahiwerwe okumiha oratteene, nto yakhalaru vammilo wala nipuro nlo vahinweryaney'aya okumihiwa oratteene, nipatuuxa naamukhaani na yeeyo ninootthikela nikhalaka. Moone, okhala wira kahi ntoko wira muthikinle ntata khuttiyela, wala etthu, wala othikila. . . Entthun'aka ohimya ti wi, mwaathikinle-ru erutthu yuulupale, khuhiya ntata nanyu vaavo, vano, nlo khanaarowa okhala nikumi. Masi—masi, moone, eyo kherina mukhalelo w'ekumi ntoko sirin'anyu. Eyo ekuru ya xetwani eneetteetta.

⁶⁸ Nto vano nwehe, nyuwo muniwiihana, meetiku onimwiihana, “kankuru.” Muluku onimwiihana “xetwani.” Nkawehani olelo. Enweryaneya paahi. . . Nuulumo *kankuru* ninkhuma yayi? Ninkhuma mwa e. . . mwa nuulumo n'Elatiino nenlo ninrumeeliwa mwa moolumo a mameetiku, nnihimya “ekhala,” ekhala yeele munoon'anyu opahari, erina metto iye sothene. Ti siiso eyo eni—eyo eniir'aya, eyo enookola metto, ni omwareya. Nuulumo kankuru ekhala. N'iyu enookela n'utthikela ekuxaka ni enuulaka ephome okathi eneett'aya, ntoko ephwesa wala etthu siiso. Vano, nipotthe, mwaana a mmaithoni, ni iretta sikina, khula emosa wa seiyo sinkhuma mw'eropo, nto eropo yeeyo ehaana okhala erutthu. Ni ehinatthi owerya okhala erutthu, ehaana okhala ekumi. Ehinatthi opattuxa wala—wala oyara ni opaka irukuruku tho, ehaana okhala ekumi. Eyo ti yoolikana? [Muthukumano oniira, “Amen.”—Mol.] Vano, kankuru uwo okhumme yayi? T'ani, okhumme yayi yoowo? Owo khaakhanle mwa nyuwo va okathi

vakhani ovinre, masi vano khino ookhala mwa nyuwo. Okhumme yayi? Eyo ekumi ekina evirikanne n'ikumi anyu, enkhala mwa nyuwo. Ni enoohooxa, ekumihaka ekumi anyu. Mwaha wa yeeyo Yesu iihanne awe “xetwani.”

⁶⁹ Awo aniihana ecile olelo, awo aniira, “ecile.” Vano, ecile, mBibiliani, Yesu iihanne “xetwani.” Okathi mulopwan'ole aarwiiy'awe ni mmiravo aamorela vathi, n'ukhuma nipheru mwaano, ni sothene, owo iirale, “Owo orina xetwani, ni imaara sinci-ene onimurihela vaikho, mmaasini.”

⁷⁰ Vano nrooreerihiwa nsina nawe vano oniihaniwa ecile, masi owo xetwani. Ni Yesu iirale, “Nyuwo xetwani, mukhume mwa mwaan'owo!” Vekeekhai. Vano, ecile voolimaleleya entothiwa ni mukattiyamiho wa isyo. Khino nyuwo munoophiyerya yeeyo ohoolo vakhani. Munnona? Eyo ennitotha ecile, ya eretta ya miyoso.

⁷¹ Vano, nkawehani mwa yeela, vano erukuruku ile enkhala vale, owo xetwani. Owo onikhaliha ekumi; onimunnuwa, akhalaka muulupalexa, muulupalexa. Owo ookhalana muteko w'ovara, okhanle, okumiha ekumi anyu. Ti yeeyo xetwani omurumenly'awe, okhuveiha ekumi anyu ya iyaakha miloko mithanu na miili.

⁷² Vano, kinnimukhomasa khula meetiku. Ayo, mulopwana. Khula siyensiya a metisiina, Muluku aareerihe mwaha wa mukhaliheryo awo aniwiirel'aya atthu. Eyo ekeekhai. Exeeni yaarowa wiiriwa molumenkuni olelo ehikhalaniwe yeeyo? Kinnimuxukhuru Muluku mwaha wa siyensiya a metisiina. Kinnimuxukhuru Muluku mwaha w'ekaaro aka. Muluku ahaamutthunihenrye siyensiya okipakela ekaaro, yaamukhala yookirikela miyo owela va. Mwaha w'aluuxu, ni esapawu y'orapihela matat'aka, ni paasita a maino wira kixukheke maino aka, vekeekhai. Kinnimuxukhuru Yoowo mwaha wa sothene, okhala wira itthu sothene sooreera sinkhuma wa Muluku.

⁷³ Masi mukihiye kooleleni, khiivo hata vakhani ya metisiina etonko ovoniha eretta. Ni khuuvo hata meetiku, 'vahikhanle wira namawoka, masi meetiku eekeekhai onimoolelani wira khanihimya okhala ampenuxa. Wa Axinna Mayo wene, ancine a nyuwo. . .kootoko okohakohiwa iwe, imaara piili wala tthaaru. Mwaha w'aretta anikhuma iwe, oohivoniheya. . . Moosoma *Reader's Digest*, yookumiheriwa ya Novembro? Akavi asome yookumiheriwa ya Novembro, artiiku ule awaka mme, mu *Reader's Digest*? Munnona? Vano yaahikiihana iwe, okohakohiwa mwaha wa mwaana awo yaamuhiyaly'aya. Khwira, “Khivaaweryaneya wiiriwa.” Masi Eroho Yowarya khulavula ni miyo khukileela moota yaarow'aya wiiriwa, vano khwiiriwa. Vaareera. Vano, awo khukiihana iwe. Nto vamukhore vene vaavo Jimmy n'akina, Mayo yaakhalaka weiwo, nookhala nipawe nuulupale naahimya wira, “Hiyo khaninihimya okhala

ampenuxa. Hiyo nnihimya paahi okhaliherya ephattu. Ori Mpenuxa mmosa, owo Mulukuu.” Awo toosuwelexa a mulaponi. Vano, nookhalana anamawoka kamosa-kamosa, ayo. Ti yeeyo. Nookhalana alaleyi kamosa-kamosa anamawoka, nave. Vaareera. Tivo, vanniiraneya ipantte soopiili.

⁷⁴ Nwehe, masi khula mutthu onihimya wira mpenuxa, onimootha, 'okhala wira khonwerya wira. Maana Bibilia oohimya, “Miyo k'Apwiya anlevelela itampi sanyu sothene ni anvoniha iretta sanyu sothene.”

⁷⁵ Kaahikhala kisomaka. Nto musaala mwaka, e... amosa-amosa wa mameetiku oosuwelexa a mulaponi khurwa. Khonsuweleya ottuli wa makhalelo, mpatthani, osuwela ekhumelenle, ni itthu kihinihimy'aka v'atthuni. Atthu anoorwa mwa siiri. Ni muhuupuwele wira aakhala maNikotemu anci-ene nlelo molumwenkuni; vekeekhai aakhala, ikonto sene a yaawo. Awo anooweha eyo n'urwa vamuthukumanoni. Okilaathi vale awanre-ene ekamiseeti, etthu ekina siiso, a masina oosuweliwa mwaarow'anyu otuthuwa, okilaathi vamuthukumanoni. Mahiku vakhani anookhuma yiitaka n'ulikari mwa siiri, n'umuruma mutthu wira akohakohe. Ni aniira vano, aniira, “Munna Branham, kinnaamini wira Eyo Ekeekhaii.” Awo atthu siiso ntoko hiyo sikhany'ahu. Vekeekhai. Ni khula mutthu onnitthuna oweha epantte ekina y'ekuwo ele orin'awe olapuwa nihiku nlo.

⁷⁶ Masi akankuru awo ni itthu iya vekeekhai t'axetwani anipakeya mw'erutthuni y'ethayi, aneetteeta, ankumiha ekumi anyu.

⁷⁷ Vano, vaakhanle wira kaamwiira ntoko meetiku, vaakhanle wira kaaniwerya okumiha-vo, khurihela vathi... Wala, ntoko paahi, kiireke, mwa nlikanyiho, nyuwo mwaari kankuru, yeenyu, elapo ela. Vano, va ori ovoniha wa Muluku. Kaatthunne wiihuluxa nyuwo mwa enamuna ya meetiku, miyo kaarowa otthikela paahi... kaahaana ottikitthela erutthu anyu, wala etthu ekina, mpakha yothene olakaseya mulaponi. Khiyaarowa okhala-tho yeeyo, siiso ntoko meetiku onikumih'awe nipotthe mwa nyuwo. Masi mwa mukhalelo wa ovoniha wa Muluku, nyuwo mwaari kankuru, kaarowa oruma wira ekumi anyu paahi wira ekhume mwa nyuwo, nto mwaamurowa. Ekumi anyu yaamoohiyani, masi erutthu anyu yaarowa okhala va siiso ntoko yaary'aya.

⁷⁸ Vano, ti vaavo woona ni okathi siry'aya nwananai a Muluku ootepexa mwa ovoniha wa Muluku. Nkisuwenle sinto Munna Baxter ootoko okhalana itthu iya vamuthukumanoni. Miyo kaahikilaathi, khimuleeliherya owo ni Munna Bosworth, imaara sinci-ene. Masi moone etthu yaakhumelela. Kinnihoverya sinto atthu anci-ene anniiwa saana, okhala wira, vanvir'aya okathi vakhani, anniweheya atthu etthikaka, yiraka, “Miyo

kaahiphwanya ovonihiwa waka, Munna Branham, mahiku manli wala mararu, masi, attottopeliwe Muluku, wo—wookihiya.” Ni kinnoona, ni kinoona wira mwaha wo wira khunthokihwi oratteene muthukumano. Atthu khansuwela saana. Yootoko okiira atthu orwa vaplataforma ary’ene oohoono mara, akankuru, wala aana mmaithoni mwaya, nave khumusoma Bibilia ola nuumala ovekeleliwa, okhuruwa; muhina mwa mahiku mararau wala maxexe okhala oohoono ntoko yaary’aya opacerya wene. Exeeni yiiraneiy? Mutthu ti mutthu onnisuwela wira ekumi yakhuma mwa khula erutthu, eyo enoonyaala okathi vakhani. Eyo ekeekhai?

⁷⁹ Ookhala va, otonko, wiiva etthove, wala enyompe, wala etthu p’itthu ntoko yeeyo? Vekeekhai. Vaareera. Munooophima ohiy’ula, nyuwo anamaxaya va, apatthani aka. Munimwiiva etthove khuhela vapalansani, khwaaleela amiravo kavi enlemel’aya. Nwehe! Voosiisu enrowa okhala ikhiilu sinci-ene voopeepheya ovikana saary’aya. Okathi mutthu onkhw’awe, mulipa a miteko s’osikha, etthu yoopacerya, onkumiha maino wala niitho, etthu p’itthu eri mmo, onookumiha; okhala wira, enoonyaala, ensukhumela ota okhala wira erutthu ya mutthu enoonyaala. Khula erutthu ekina enninyaala. Ekumi yakhuma-ru mw’erukurukuni, enoopacerya ovukuwa, onyaala. Enimwiira siiso okathi woophiyaka ntoko iwoora miloko mithanu na miili. Vano nto enoopacerya wiipelana. Mmuhiye mwalapwa aphitiwe, muramphani mu. Mmuhiye akhale vansuwani vale mahiku oophiyaka mararu, nto nwehe etthu eniiraneya. Owo onnimunnawa ntoko sihinakhaly’awe. Onoosalelana. Eyo ekeekhai? [Muthukumano oniira, “Amen.”—Mol.]

⁸⁰ Ahe, eyo etthu emosaru eniireya okathi xe—xetwani onoomoliw’awe mwa mutthu onwereiwa. Mahiku vakhani oopacerya, “Oh, kinnoona saana.” Nto khunapacerya wira, “Kino—kinoowereiwa ovikana si—sihinatoko aka. Wookipweteya ovona waka.” Siiso ntoko waamini okumihaly’aya, ohaamini onooruaha-tho ohokoloxaka. Siiso waamini oniiv’aya, ohaamini onooihimuxa. Yesu oohimya, “Eroho yootakhala yamukhuma mutthu, eyo enneetakasa mothakoni ni enniithika n’axetwani akhina athanu n’anli.” Vano mwaneene etthoko ooreera murima aaheemele-ru vaavo wira akhapelele mukhor’owo, eyo enoovira khukela. Vano mwaneene etthoko ooreera murima ti waamini wanyu. Mwiire, “Mukhale ottaiwene!” Ti yeeyo.

⁸¹ Masi vano mmuwehe mureta ovonihiwe, voolimaleleya, ’waahikhale mwiiriirya woosuwanyeya. Yoowo, ovoniha wa Muluku ni mwiiriirya itthu piili soovirikana. Ovoniha wa Muluku, etthu emosa; mwiiriirya etthu ekina. Masi etthunelo yoolimaleleya ya ovoniha wa Muluku, okathi erooho yootakhala enoomoliw’aya, xetwani a kankuru, okathi enimuhiy’aya mutthu, “Oh!” Vano, wala nrowe niire ninrowa okuxa etthu

emosa wira eweryaneye wooniwa oratteenexa, kinrowa wira, mwaana a niitho. Exeeni yiiraneieye okathi mulopwan'ole... Mwamuweha vale mutthu ohinoona. Nkisuwenle sinto kootoko okhalana mmosa va wala nnari, nlelo, maitho arina mwaana. Kinoomuhiya weemela minuutu vakhani. Mwaha wa xeeni? Wira ophunyala opacerye wiiraneya. Kinimwaaleela wira ehokolowe, enivahe onamoono. "Oh, wulu!" Awo anoowerya woono vooreerexa. "Oh, wulu! Paahi, kinniweraya woono itthu! Ayo! Miyo... " Mulattu ene xeeni? Ekumi yoorowa; erutthu ya mwaana a niitho enoophunyala. Ahe, enimwiira siiso mahiku manli. Aniira, "Oh, koopacerya okhala saana."

⁸² Nto nuuvira okathi vakhani, khunapacerya owereiwa muru, khanoona saana. Anoovenya mmeeloni mwaya, "Onookipweteya-tho woono waka."

⁸³ Akina aniira, "Uh-huh, nyuwo mutteeliwe murima paahi. Nikhuru nle na masantu oophirikeya nootteelin'heni murima paahi." Muhaamini yeeyo! Iwo wootha wa xetwani. Mwaaminiru yeeyo, munootthikela okhala-tho ohoona.

Masi mwaliparu, khwira, "Nnari, Pwiya, kinnaamini."

⁸⁴ Vano exeeni eniiraneya? Erutthu ile enoosalelana okathi woowaatta. Enoottiyelela-tho woono iwe. Kankuru ule mw'erutthuni onoosalelana. Munooowereiwa ni munimoona-tho owereya. Nto munooowereiwa vootepexa, owereiwa vootepexa. Mwaha wa xeeni? Wiipa iwo w'erutthu yookhwa mwa nyuwo emhwanyaneya vaavo, yookhwe-ene.

⁸⁵ Munootthika, meetiku n'uwu oniira, "Oh, ethiru iyo. Ookhala kankuru vaavo vo. Kinniweraya omoon." Vekeekhai, ori vaavo, masi ohookhwa. Aleluya!

⁸⁶ Vano, evirelo y'ephome ehaana oreeriha erutthu. Khula okathi murima onthimak'aya, onvaha ephome mw'erutthuni, vano eyo enoophwanya eyiipelo eyo. Vekeekhai, enimookhalihani muretta. Ankhi mwaarina nipattuuxa n'ethayi eryeene mwa nyuwo nipuro nlo, wala yoorekama ntoko enowa, wala etthu yuulupale ntoko ekatha anyu, nto eryeene vaavo, nave ery'ene yookhwa, ethayi iyo yookhwa ery'ene mwa nyuwo, vano yinttaka? Ahe, vekeekhai, evirelo y'ephome anyu ehaana okhaliha eyo yooloka, okathi enivir'aya. Masi yookhala erutthu yookhwa, etthu yiithomeiye vo, okhala wira ekumi aya yookhuma mwa yeeyo. Owerya wa Muluku, mwaha wo waamini, yosukhuma. Owo xetwanii; ohaana okhuma.

⁸⁷ Masi, mwaha aya, atthu khanxutthiwiwa. Awo anookhuma, khuhiya. Nto xetwani ene yoole omphwanyaneya vaavale, wira akuxe-tho. Okathi Muluku onooleel'aweni etthu p'itthu vaplataforma va, mwa Eroho Awe, vathi va muupuxeryo, muhiverye eyo, ahiiso etthu yootepa otakhala enoowiirani, Owo oohimya. Maana Yesu ohimnye wira, "Mukhalelo wookiserya wa mutthu uwo waari wootepa imaara thanu na

piili ovikana waary'aya opacerya wene." Eyo ekeekhahi? Okathi erooho yootakhala emukhummy'aya mutthu, eyo yeetakasa mothakoni, khuhokolowa n'axetwani akina athanu n'anli. Tivo, muhikhale oohaamini. Mukhale ni Yeeyo. Mutthune yeeyo, ni murim'anyu. Mwiire, "Nnari, mulopwana! Nkinihiyererya! Hata wira kinwereiwa sayi, eyo kherina naata n'iyoy." Nto, okathi muhinuupuwelel'anyu, munoopacerya openuwa. Sothene sinookhala saana nto. Moone, ehookhwa. O—operasawu meetiku aarow'awe okumiha mwa nyuwo, nipotthe nenlo nri mwa nyuwo, nihirina ekumi memmo.

⁸⁸ Nyuwo muniira, "Ekumi memmo, Munna Branham, nlo ninookumiha ekumi aka?" Nnari, mulopwana. Ekumi iyo ekumi yoovalaana ni yawinyu. Kinoomalaru owooniheryani wira nyuwo mw'ekumi nto munkhala yookhala, ni eyo ekumii ni enkhala yookhala; nto nyuwo mwa a Muluku, vano eyo ti ya xetwani. Munnoona entthun'aka ohimya? Oxutta s'axetwani. Vano, mwaahaana oweha moota enlattan'aya etthu iyo okathi muneemel'anyu wira nwehe.

⁸⁹ Oh, wulu, kileveleliwe, ehanle ophiya iwoora ttharu ni minuutu miloko miraru. Kileveleliwe. Nkawehani, apatthani. Oh, etthu olumwenk'ula entthun'aya!

⁹⁰ Soovira iyaakha soophiyaka thanu na piili, kiixuttihaka wAmerika, kikhalanaka miteko iya sa ovoniha. Kinoomalaru okhalana esuwelelo wira kipacerye mulaponi, kimwiixuttihaka Bibilia, ni mwaha wa oxutta s'axetwani, moota atthu akhanly'aya osuwelaka saana etthu yo wira. Nto mwaha wa yeeyo, awo anrow'aya mithukumano iya, imaara sinci-ene, ni, apatthani. . . Nyuwo mwaahisuweleke saana, atthu animoorwa, nto imaara sinci-ene. . .

Vano, munnimuupuwela mutth'ule aarwiiye khwira wira aahikhalana yoovaha ya ovoniha wa Muluku? Yoovaha y'ovoniha wa Muluku yaari mwa nyuwo vakhala wira moovonihiwa. Ti nyuwo, mmose-ene. Khula yoovaha envara muteko mwa waamini. Nto hata wira yoovaha kavi ya ovoniha wa Muluku kirin'aka, miyo kaaminiru ni murima wothene, masi mwaamuwerya okhala va ni, mwaahikhalane enamuna emosaru yo waamini, kenooreerelani etthu. Kaamuwerya woovekelelani, iwoora n'isumana ni miyeeri. Kahi alaleyi ni ovoniha wa Muluku. Ti nyuwo murina yoovaha ya ovoniha wa Muluku, munaamini ovonihiwa, 'okhala wira enkhala mwaha wo waamini. Mwaha wo waamini! Khula eyiirelo ya Muluku enkhala mwaha wo waamini.

⁹¹ Ikaruma sothene sa Muluku sinkhala mwaha wo waamini. Hiyo kharina etthu y'ephattu y'olumwenku ula. Itthu sothene s'e—s'ekereja y'eKristu eyiirelo yo waamini. Nkawehani ikaruma sa Muluku, ophenta, ohakalala, murettele, ohiviruwa pure, oreera murima, wiisumaaliha, ereerelo murima, ovilela.

Eyo ekeekhai? Sothene soovikana ephattu, hat'etthu y'ephattu. Tivo khaninweha itthu s'ephattu, okhala wira niniira mwa soovikana ephattu. Nto enamuna emosa paahi nikhanly'ahu olupiherya yeeyo, waaminii, ti mwa ele Muluku ohimaly'awe okhala Ekeekhai, nto hiyo ninweha ele Ehinooneya. Ni nihaana itthu iye sihikhanle, ntoko saakhanle; ntoko Abrahamu iiraly'awe, khwaakhela. Amen! Abrahamu iihanne itthu iye sahaakhanle, ntoko Muluku siiraly'awe, ntoko saakhanle. Arineene iyaakha emiya, khaamuhovenrye natiri a Muluku mwaha w'ohaamini.

⁹² Kaamuwerya otthokelela yeeyo, nyuwo khamwaawerya? Omoona Sara ovenya voosiisu. Muluku iirale, "Abrahamu!" Khwira, "Abrahamu, munoorowa okhalana mwaana."

⁹³ Sara khuvenya. Khwira, "Munoona sayi, Sara?" Ola muttitthi wotakanxeya, masi nwiriyane.

"Khivavirikanne."

⁹⁴ "Ahe, avuwihwe Muluku, ninoorowa okhalana! Murowe mwathume ekuwo ya ifralata ni maalufinethi, n'itthu sothene. Mwiilikanyihe."

Vaareera, khuvira mweeri mukina. "Sara, munoona sayi?"

"Khivavirikanne."

Khuvira mwaakha. "Sara, munkileelani?"

"Khivavirikanne."

Khuvira iyaakha muloko. "Khivavirikanne."

Khuvira iyaakha miloko miili ni thanu. "Khivavirikanne."

⁹⁵ Abrahamu, ohiya otteettheya, owo aatempe okhalana ikuru. Owo aahisuwela wira waarowa okhalaxa mwiiriirya okathi wothene, 'okhala wira aahimwaamini Muluku, ni khaamuhovenrye natiri a Muluku mwaha wo ohaamini. Owo iirale, "Ninoorowa okhalana!" Nto voosiisu umosa mmirimani mwa Sara khupacerya wuncerereya-mo, nto Isakhi mwaamukhaani khuyariwa, okhala wira Abrahamu aahimwaamini Muluku. Vano aahiweha itthu, khuhelela itthu iye sahaakhanle ntoko saakhanle.

⁹⁶ Kahi ni miyoonelo, kahi n'uweha. Khoneettiwa mwa miyoonelo wala wona. Onkhala mwaha wo waamini. Nto okathi Muluku ohimaly'awe etthu p'itthu, iirale, "Sothene sinvekel'anyu, mwaalompaka, mwaaminiki wira munimwaakhela," vano nvarelele yeeyo. Muluku ohimnye siiso, ehaana okhala siiso! Amen. Axetwani!

Owaamini Atithi, omwaamini Mwaana,
 Waamini Eroho Yowarya, ooraaru mwa
 Mmosa;
 Axetwani anoorthukumela ni anatampi
 anoovenya;
 Omwaamini Yehova onoottikinya khula etthu.

Ti yeeyo. Oh, wulu! Vekeekhai ti yeeyo. Mmwaamini Muluku. Mmuweheke Yoowo. Muhittikinyeye. Mukhale vaavo vo. Muluku ohimnye siiso!

⁹⁷ Nto, axetwani, awo axeeni? Awo t'okhala a muroohoni. Vano, me—meetiku oniira, “Mookhalana kankuru. Mookhalana elapaha. Mookhalana mwaana mmaithoni. Mookhalana eretta ya iphumu. Mookhalana *ela*.” Owo xetwanii. Eyo ekumii, nto ottuli w'ekumi iyo yookhala erooho. Akavi ansuwela ni anwerya woona wira kankuru, mwaana a niitho, ookhalana—ookhalana . . . Eyo eroohoo, erina—erina ekumi mwa yeeyo. Ahe, khiivo enwerya okhalana ekumi ehirina erooho, moone, tivo ehaana okhala ekumi wira yiire yeeyo, nipuro nlo.

⁹⁸ Hata mwiri ule vale wookhalana ekumi mwa yoowo. Siyensiya othene a mulaponi khowenrye opaka nikukhu na malaxi. Nyuwo mwaanisuwela yeeyo? Awo ampaka etthu enkhala mwa yeeyo, masi khanwerya ophwanya nthoonyeryo w'ekumi. Owo Mulukuu. Munnona? Yesu aahiirela mwiri, “Mutakhaliwe. Khamurina hata muhokorokho, ni khamunrowa-tho okhalana.” Awo khuvira vaavale etthikaka. Yaari ewoora yoophiyaka thanu na tthaaru voosiis'ule. Khuvira etthikaka ewoora yoophiyaka muloko n'emosa, erowaka olya y'othana. Petru khwira, “Nkawehani mwiri ule, ohookhwa opacerya mmitathaarini.” Mwaha wa xeeni? Yesu aahipwapwela ekumi yaari mmwirini mme, yaari mmitathaarini, vano etthu yothene khukhwa. Aleluya!

⁹⁹ Kristu ene yoowo onniwerya omupwapwela kankuru okhuma mmitathaarini, nto etthu yothene enimookhwa. Mwiri ule waaphwanyaneya vale siiso ntoko waary'aya, iwoora saavinre, masi vannoonaneya wira mataakhuru yaahipacerya omora, vano nto ninnooneya nipapatthu opacerya waateya. Nto e . . . Khunapacerya onyaala, nihiku ti nihiku, ni esumana t'isumana, nto okathi vakhani khinaahanle hata nipattuuxa na mwiri ule. Aleluya! Kankuru, nipotthe, mwaana a niitho, wala etthu p'itthu ekina, ehaana orowa Kristu alavularu. Owo aahiwoomola axetwani. Ni Owo ohimnye wira, “Mwa Nsina Naka anoowoomola axetwani, olavula ilavulelo isya, ovara inowa, wala owurya itthu siniiva, khasinrowa waatakhaliha. Yawiixaatherya matata aretta, awo anoopenuwa.”

¹⁰⁰ Nyuwo munnimpheenta Yoowo? Kileveleliwe mwaha wo woopisihani ewoora ntero va oxekuw'ola, mukilanthe va. Munnaaphenta Apwiya? [Muthukumano oniira, “Amen.”—Mol.]

Exeeni enrowa okhumelela vano? Mwamukupaliru Kristu ntoko mpenux'anyu, ni waamini mmurimani mwanyu wira yoowiirani etthu, ni waamini wira moovonihiwa, munoorowa waamini wira moovonihiwa? Muhimuhiye xetwani okeliha-tho etthu ekina mwa nyuwo. Mukeleleke ohoolo paahi.

“Meetiku,” mwiire—mwiire, “meetiku, enlikana ni xeeni yeeyo?”

Owo oniira, “Vano, nlelo eri vaavo.”

¹⁰¹ Mmurimani mwanyu nyuwo munnisuwela, munnisuwela etthu yiiraneiyee. Ha! Naanaanoru, oniira, “Nwehe, kaatthuna kisuwele exeeni ekhumelenle n'etthu ile?”

¹⁰² Nto mwiire, “Nkawehani, meetiku, kinrowa wooleelani. T'ila ekhumelenle, Yesu Kristu ookivoniha. Ti yeeyo. Yesu Kristu ookivoniha.”

¹⁰³ Vaareera, nrowe nuurame miru sahu okathi vakhani paahi. Munna Willet, mwaamuwerya orwa va minuutu mmosa paahi, munna?


¹⁰⁴ Vano, Tithi a Wirimu, hiyo ninnixukhuru mwaha w'Ephome ya Kristu. Nto khino imaara sikina murumeyi Anyu, Pwiya, khonrumeela ankhili, mwaha w'olavula vanci-ene. Masi siiso kiisoonaka ntoko Paulo, aalaleiye ohiyu wothene. Mmiravo mmosa khumora vacanelani khukhwa. Nto murumwa ole, ni Masu a Muluku mmakhaleloni mwawe, aahirowa khuphitherya erutthu awe vasulu va mmiravo, ekumi khimurweela khukhala-tho mukumi.

¹⁰⁵ Muluku Ootthuneya, kinnoona wira omora w'ekhalelo y'atthu ila yuulupale vano onootepa, vahooxa saana, eriyari ya nihiku yoovira, miyuuttutthi sa makaaripi sinoomora. Waarya wuulupale onookela yoowo onkhuma mOmweneni mwa Muluku, wira okuxe opuro aya wa ewiriphi ila yoomalela enrwa mulaponi. Muluku, kinnisuwela wira kinimuuluvala khula nihiku. Mukihiye kirowe, Pwiya. Mukivahe ikuru. Mukikhaliherye olavula Ekeekhai ila yuulupale mapuro othene. Munikhaliherye, meelo oxekuwa, wira niiwe oratteenexa.

¹⁰⁶ Nto, Muluku ootthuneya, mureerihe muthukuman'ola mwamukhaani oxekuw'ola. Olelo ohiyu, awo yathukumana vale mwaha wa muteko wo ovoniha, khula mulopwana ni khula muthiyana omphiyerye mukina epacerye ovaneela, yiiraka, “Vano, va eri... muhi—muhihoverye-tho. Hiyo ninnisuwela saana enikhum'aya-wo vano. Noosuwela wira owo xetwanii. Ni noosuwela wira aakhumaka vale, ohaana wiiwelela oruma wa Muluku. Ohaana wiiwelela. Muluku ohimmye siiso. Owo ohaana okhuma.” Vano, erowe, ooteeliwa murima, etthapaka, ehimyaka wira openuwa ti wawaya. Hat'etthu, ehikhale hat'etthu enaattiyelela, tho; erowe paahi, yaaminiki.

¹⁰⁷ Nto, Muluku, ekerej'ela yaamukhaani va, n'ikereja iya sinkhaliherya, sikhhalane muhakalaliho nuumala muthukuman'ola, Pwiya, otthikele wiiraneyaka, ni minepa imiya sinci-ene siruuhiwe mOmweneni mwa Muluku. Munivahe, Tithi. Wira alopwana n'athiyana va, a ilapo sinci-ene ni mapuro makina, ekuxe Mutthaka etthikelaka mukereja mwaya, ni wira ekhalane muhakalaliho wa enamuna ya khalayi. Munivahe, Pwiya. Munilevelele itampi sahu vano. Munikhaliherye okhala arumeyi Anyu. Mwa Nsina na Yesu Kristu. Amen.

¹⁰⁸ Kiiroke, mukilanthé-ene va, ookhala natampi mpaani mu olelo, aarowa wira, "Munna Branham, mukuupuwele mmavekeloni"? Munnitthuna, munnitthuna ovenxa ntata? Ookhala mutthu namattheke? Miyo nki. . . Muluku ooreeriheni, muhano. Ookhala? Muluku ooreeriheni, mulopwana. Nyuwo, ni nyuwo, ni nyuwo, Muluku ooreeriheni. Kiiroke nyuwo. . . Vano, ela ti yawinyu.

¹⁰⁹ Moone, nkinkupali orowa mpakha muthukumano. Nkiniwuulumela akina aniira. Nkinkupali orowa vamuthukumanoni weererya omuruuha mutthu. Munnona? "Khaavo onwerya orwa, ehikhanle wira Atithi Yaawo anrowa omuruuha." Munnona? Ti yeeyo. Munoomuruuha vo paahi owo ahitthunne. Munnona? Masi Muluku amana vamurimani vanyu, nyuwo mwa mutthu ooreeriwaxa mulaponi. Nyuwo khamusuwenle atthu akavi kilavulann'aka. 

OXUTTA S'AXETWANI — MUKHALELO WA MW'ERUTTHUNI EMK53-0608A
(Demonology — Physical Realm)

ETTHARANELO YA OXUTTA S'AXETWANI

Mutthak'ola wa Munna William Marrion Branham, opaceryawene olaleeriwe ni Enkelesi Esekunta ohiyu, mahiku yeettaka 8 mweeri wa Junho, 1953, wAnfiteyaaturu Roberts Park oConnersville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org